

萬 有 文 庫

第二集七百七種

王 雲 五 主 編

宋 詩 紀 事

(五)

厲 鶚 曰 瑄 輯

商 務 印 書 館 發 行

宋 詩 紀 事

(五)

輯 瑄 曰 馬 鶻 厲

國 學 基 本 叢 書

萬有文庫

第二集七百種

總編纂

王雲五

商務印書館發行

宋詩紀事卷二十五

晁端友

錢唐厲鶚輯
吳毛德基勘定

端友字君成。迴四世孫。无咎之父。第進士。爲杭州新城令。有新城集。

葉石林云。外祖晁君成善詩。蘇子瞻所謂清厚靜深。如其爲人者也。

黃庭堅撰晁君成墓志銘。晁氏世載遠矣。而中微。有諱迴者。事某陵爲翰林學士承旨。以太子少保致仕。謚文元。生執政。開封晁氏始顯。君成曾王父諱迪。贈刑部侍郎。王父諱宗簡。贈吏部尙書。父諱仲偃。庫部員外郎。刑部視文元母弟也。君成夫人楊氏。生一男。則補之。以元豐甲子十月

乙酉葬君成于濟州任城之呂原。

宿濟州西門外旅館

寒林殘日欲棲鳥。壁裏青燈乍有無。小雨悵悵人不寐。臥聽羸馬齧殘芻。合璧事類續集。

馬處厚席上探得早梅

嶺梅何處早。雪裏看芳菲。北陸寒猶在。南枝春已歸。曉妝初見妒。殘角未成飛。引我江頭夢。清香憶滿衣。

瀛奎律髓

甘露寺寺有石如臥羊謂之很石

北固山頭寺。風煙昔縱觀。臥亭秋石很。環舍海濤寒。越舶樓前聚。江楓戶外丹。最宜清夜月。虛閣憶盤桓。

早行

馬上雞初唱。天涯星未稀。驚風時墜笠。零露暗沾衣。山下疎鐘發。林梢獨鳥飛。遠峯煙靄澹。迤邐見朝暉。

以上文翰類選

齊廊

廊字公廊。會稽人。舉進士。歷三司度支判。開封府出爲江淮轉運使。積官至光祿卿祕書監。卒。

寶林寺

峯勢聳如龜。簷牙照錦堂。路盤危磴出。僧觸斷雲歸。萬井分塵界。千巖列翠圍。浮生任多事。到此合忘機。

越詠

如歸亭

疊飛綺構成。賓至得佳名。岫列千螺出。江涵匹練平。吟看客帆度。坐見釣舟橫。獨倚雕闌外。令人心骨清。

吳江縣志

李奉世

句

珠鞍昔御恩猶在。玉輦親扶事已非。

石林詩話神宗皇帝天性儉約奉慈壽宮尤盡孝道慈聖太后嘗以乘輿服物未備因同天節作珠子鞍轡爲壽神宗一御于禁中後藏去不復用一日與兩宮幸後苑賞花慈聖輦至神宗卽降步親扶慈聖出輦輦卻不從聞者太息慈聖上仙李奉世時爲侍郎進挽詩云蓋記此二事神宗覽之泣下

曰路按二句孔平仲談苑作王存但小異耳今兩存之

李行中

行中字無悔本雪川人徙居松江高尚不仕獨以詩酒自娛晚治園亭號醉眠東坡居士與之遊賦佳人顰梅圖

顰眉顰髻縷金衣折得梅花第幾枝顰盡餘香不回面思量何事立多時

中吳紀聞云

意尙深遠

自詠醉眠亭

簷低檻曲莫嫌隘地僻草深宜晝眠代枕暮憑溪上石當簾時看屋頭烟倦遊拂壁畫山逕貪醉解衣還洒錢一水近通西浦路客來猶可棹漁船

寄韓憲仲廷評

野徑荒亭草沒腰一眠聊以永今朝放懷不管人閒事破夢時聞夜半潮冰柱劉叉詩未厭金龜李白酒

難招知君有意尋安道。咫尺何時動畫橈。以上至元嘉禾志。

韓宗文

題李無悔醉眠亭

得酒休論飲得仙。醉中遺物爲神全。世閒反覆無窮事。吏部難忘抱甕眠。松江府志。

蘇 枕

題李無悔醉眠亭

趁陽渴鹿背清泉之子名。亭取性便適意中閒卻無事。期君忘醉亦忘眠。松江府志。

晁端佐

題李無悔醉眠亭

蕭灑松陵江上亭。醉來一夢遶雲屏。生前笑語君須惜。世事紛紛不用醒。至元嘉禾志。

關景山

關字彥瞻。景仁弟。舉進士。

題李無悔醉眠亭

杜老顛狂尋酒伴。經旬出走只空牀。輸君縱飲還高臥。長有生涯在醉鄉。至元嘉禾志。

母 沆

沆太常少卿。

遊王官谷

不污唐家亂。蕭然表聖居。泉聲與山色。相得共清虛。
熙寧戊申歲冬至。虞鄉縣令俞充書。 王官谷集

王觀

觀字明叟。如皋人。第進士。哲宗朝。擢右正言。進司諫。徽宗朝。遷御史中丞。改翰林學士。安置臨江軍。卒。入黨籍。

望日與諸公會于大慈。聞海雲山茶合江梅花開。遂相邀同賞。雖無歌舞。實有清歡。因成拙詩奉呈。
野寺山茶昨夜開。江亭初報一枝梅。旋邀座上逍遙客。同醉花前潏灩杯。秀色霜濃方潤澤。暗香風靜更徘徊。仙姿莫遣常情妒。不帶東山妓女來。
成都文類

胡宗師

和王公觀賞海雲山茶合江梅花

錦水黃金密印開。東南時望滯鹽梅。得隨劍外同爲客。幸逐花前醉倒杯。白玉蘂高枝瘦碧。燕支萼嫩葉低徊。綺羅不識清詩骨。須趁春風摸石來。
成都文類

徐彥孚

和王公觀賞海雲山茶合江梅花

萬蘂山茶傍臘開。一番春信入江梅。追遊共按黃金轡。縱賞還傾白玉杯。濃艷迎風香斷續。疎枝橫月影徘徊。隼旗不負登臨興。更約攜朋載酒來。
成都文類

吳師孟

師孟字醇翁成都人

成都記吳師孟張商英張唐英善書天覺喜草而不工東坡戲之所謂脫帽風流餘長史是也

和王公觀賞海雲山茶合江梅花

何處珍叢最早開。海雲山茗合江梅。忽傳詩帥邀膚使。不用歌姬侍宴杯。曉豔鮮明同綺靡。晚妝清淡奉徘徊。此時文酒風流事。豈似臨江放蕩來。

成都運司園亭詩 和章質夫

翠錦亭

東閣治臺政。西堂備燕飲。介于二堂閒。華構饒花品。紅紫鎮長春。四時如活錦。公暇一繩牀。上有通中枕。茅菴

結茅爲圓屋。環堵不可牖。齋居如雁堂。廣長纔六肘。深藏子猷竹。不植陶潛柳。勿起滅定心。宴坐空諸有。
以上成都文類

徐介

介陽翟人官屯田

過杜工部墓

水與汨羅接。天心深有存。遠移工部死。來伴大夫魂。流落同千古。風騷共一源。江山不受弔。寒日下西原。

王得臣歷史熙寧初調官泊報慈寺陽翟徐秀才出其父

屯田詩清苦平淡有古人風其過杜工部墓一首云云

胡璞

璞字器之南平人熙寧三年進士

經采石渡

抗議金鑾反見讐。一杯蟬蛻此江頭。當時醉弄波閒月。今作寒光萬里流。

輿地紀勝蘇子瞻見之

疑唐人作歎賞不已

陸佃

佃字農師越州山陰人熙寧三年擢甲科徽宗朝仕至吏部尙書拜尙書右丞罷知亳州卒入黨籍有陶山集

送人之潤州

丹青太守舊名卿。騎竹兒童夾道迎。醉尹笙歌添酒病。謫仙風月苦詩情。江湖天地農桑早。水竹人家枕簟清。白首懷君心未已。夢魂猶繞鳳皇城。詩林萬選

贈別吳興太守中父學士

蓬山仙子任天真，乞領南麾奏疏頻。金鎖闕邊辭黼座，水晶宮裏約朱輪。公庭事簡煩承掾，齋閣詩多泣鬼神。莫爲行春戀蒼雪，蠻坡揮筆待詞臣。瀛奎律髓

句

棠棣行中排宰相，梧桐名下識韓家。

能改齋漫錄：韓子華兄弟皆爲宰相，門有梧桐。京師人以桐木韓家呼之，以別魏公也。子華下世，陸農師作挽章云云，蓋紀實也。

鄧忠臣

忠臣字謹思，長沙人。熙寧三年進士，仕至考功郎，坐元祐黨廢。有玉池集。

考校同文館戲贈子方兼呈文潛次无咎韻

五年坎壈哀南方，江湖魏闕兩相忘。洞羅巖桂辜孤芳，月潭風渚儔漁郎。單閼孟夏草木長，望都樓觀鬱蒼蒼。忠臣：熙寧六年六月以宗艱去國，丁卯四月還省。誰令焚芟辭楚狂，復來上君白玉堂。黃門戟曜羽林槍，未央引籍班胡光。雲屯錦膊馬斯臧，大官日膳瓊爲糧。追隨威鳳鳴高岡，豈敢偃息復在牀。投鈴歸休下殿傍，衛士傳詔來如驤。館閣外西城隍，書臺迫遽不及裝。籲俊士集要言揚，得弓勿問何人亡。趙璧旣入秦城償，穎脫喜見錐出囊。同人于野不擇鄉，峩峩羽翮整顏行。金闕玉勒皆驢驕，伯喈懷牘望金商。天啓：魁梧奇偉，值子房。文潛：家令數術應帝王。无咎：三英粲粲日爭光。我輒與之較雌黃。芳菲滿室蘭生香。坐堂月久秋氣涼。將軍思歸歌撫觴。子方：倚梧目送雁南翔。想見葭菼水中央。洞庭河漢遙相望。香楓葉老赤染霜。感

槃少日七步章。長安城西約鄭莊。予與子方先告文潛天啓嘗有此約。牽率不往有底忙。人生可意乃吉祥。快馬
劃過小苑牆。入門爛醉銀瓶漿。秦箏趙瑟喜高張。同文館倡和詩。

邯鄲道中夜行阻風

欲瀉懸河雨。先號拔木風。問津扈吠處。覓路電光中。徒御憂羣盜。兒童笑拙翁。當知步兵哭。初不爲途窮。
瀛奎律髓

蔡京

京字元長。興化軍仙遊人。熙寧三年進士。歷尙書右僕射。轉司空。累封魯國公。加太師。徽宗朝凡
四入相。靖康中再被貶。死于潭州。

清波雜誌。蔡京死潭州。數日不得殮。棄葬漏澤園。以青布
條裹屍。初宣和年間。京師染坊有名太師青者。茲其識也。

題保和殿壁

瓊瑤錯落密成林。檜竹交加午有陰。恩許塵凡時縱步。不知身在五雲深。
侍宴保和殿命賡補成篇

保和新殿麗秋暉。恩許塵凡到綺闌。雅興酒酣添逸興。玉真軒內見安妃。
見安妃像

玉真軒內暖如春。只見丹青未見人。月裏嫦娥終有恨。鑑中姑射未應真。

夢湖雜記東都宣政閒禁中有保和殿殿西南廡有玉真軒軒內有玉華閣即安妃妝閣也妃姓劉氏入宮進位貴妃林靈素以左道得幸謂上爲長生帝君妃爲九華玉真安妃每降神必別置妃位畫妃像其中每祀像妃方寢而覺有酒容是時羣臣唯蔡元長最承恩遇嘗賦詩題殿壁云云待宴于保和殿上令妃見京先有詩命京賽補成篇須臾命京入軒見妃像京又有詩云已而至閣妃出見京勸酬至再日暮而退

與范謙叔飲西園

一日趨朝四日閑荒園薄酒願交驩三峯崛起無平地二派爭流有激湍極目榛蕪唯野蔓忘憂魚鳥自波瀾滿船載得圭璋重更掬珠璣洗眼看

墨莊漫錄范致虛謙叔與蔡元長相忤久處閑散宣和初自唐州方城召還提舉寶籙宮未幾執政時元長以五日一造朝居西第乃與謙叔釋憾一日觴于西園主禮勤渥元長作詩見意三峯二派指王黼林靈素輩方盛也

恭和御製己亥十一月十三日南郊祭天齋宮卽事賜詩

雪晴至日月初南帝舉明禋祀事嚴萬瓦溝中寒色在一輪空外曉光暹雲和龍軫開冰轍風暖鸞旗拂凍簷共喜天心扶聖德珠璣更誤寵恩霑

題神霄宮

下馬神霄第一回時空宮殿九秋開月中桂子看時落雲外仙輶特地來以上揮塵餘話

詔賜南園贈親黨

八年帷幄竟何爲更賜南園寵太師堪笑當時王學士功名未有便吟詩

中吳紀聞。南園乃廣陵王舊園。中有流杯旋螺亭。亞于滄浪之景。王黃州爲長洲時。無日不攜客醉飲。嘗賦詩云。他年我若功成後。乞取南園作醉鄉。今園中大堂。遂以醉鄉名之。大觀末。蔡京罷相。欲東還。詔以其園賜之。京卽以詩贈親黨云。黃州之詩。不過寓意耳。京遽以無功名誚之。黃州雖終爲黜臣。其名與天地同不朽矣。

寄子攸

老嫗身心不自由。封書寄與淚橫流。百年信誓當深念。三伏征途盍少休。目送旌旗如昨夢。心存關塞起新愁。緇衣堂下清風滿。早早歸來醉一甌。

獨醒雜志。燕山招納之舉。多出於蔡攸。王師敗于白溝河。元長以詩寄攸云云。稍傳入禁中。徽宗命京進呈。上閱畢曰。三伏征途。不若改作六月。王師觀此。則是舉非惟當時人知其非。雖其父亦知之矣。

別寵姬

爲愛桃花三樹紅。年年歲歲惹東風。如今去逐他人手。誰復尊前念老翁。

揮塵後錄。蔡元長既南遷。中路有旨取所寵姬。慕容邢武者三人。以金人指名來索也。元長作詩以別云。

句

龍燭影中猶是臘。鳳簫聲裏已吹春。春帖子 西清詩話。

蔡卞

卞字元度與兄京同年登第王安石妻以女因從之學元豐中以薦爲國子直講徽宗朝累擢知樞密院加觀文殿學士拜昭慶軍節度使政和末謁歸上冢道死紹興初追貶單州團練副使

贈華陽法師

師到華陽洞仙花幾度開祇應常救物卻遣世人來茅山志

汪泌

東湖共樂堂

臨海城東湖氣象清且奇無風綠色淨十頃澄琉璃中有共樂堂今其名者誰或人答我問太守下車時訪民所疾苦民曰水最危其水或暴至城壞民流屍公謀得上策疊石金城基外遣數百家室屋鱗參差水至無所障適與漂溺期又欲隄其東苦乏土石資開湖足取用隄勢橫虹霓湖光占空闊物從鑑中窺紫翠前後山環列如屏幃結屋就虛曠與俗同遊嬉太守宴堂上遊人歌水湄歌云從公來除患補瘡痍況有此壯觀不樂復何爲有如登春臺人心舉熙熙從事能文者作辭書之碑庶幾不朽功上徹堯軒墀

台州府志台之東湖地初爲水軍營熙寧四年郡守錢暄始開爲湖中有共樂堂流杯亭諸勝汪泌有詩

錢暄

暄字載陽惟演子以父蔭累官駕部郎中知台州拜寶文閣待制卒子景臻尙秦魯國大長公主題東湖共樂堂

疏就湖山秀氣濃。花林茂列景爭雄。管弦交奏客懽合。臺榭競登人喜同。環陸鸞行飛早晚。平波魚陣掠西東。荒蕪芟去成佳致。換得汀洲月與風。

晁端禮

台州府志。熙寧四年。晁守台州。累石修城。以水至漂溢。鑿湖以受衆水。凡一萬六千步。有共樂堂流杯亭在湖心。詩云。

端禮字次膺。熙寧六年進士。兩爲縣令。忤上官坐廢。晚以承事郎爲大晟府協律。有閑適集。

能改齋漫錄。政和間大晟樂成。蔡元長以次膺薦。詔乘驛赴闕。次膺至都。會禁中嘉蓮生。遂屬詞以進。名並帶芙蓉。上覽之稱善。除大晟府協律郎。不克受而卒。

絕句

去日玉刀封斷恨。見來金斗熨愁眉。黃昏飲散歌闌後。懊惱水邊樓上時。

侯鯖錄。次膺薄游南京。嘗作詞云。花前月下堪垂淚。水邊樓上總關心。後過其家。已與客飲。復作詩云。

句

尋常自是司空慣。咫尺寧憂丞相嗔。

漫叟詩話。次膺卽席贈妓句。雅不減張祜。骰子裏手之作。

晁端受

瑯琊翠微亭

曉風吹落秋泉聲。夜雨洗出秋山色。上有樓臺深翠微。可惜丹青圖不得。滁陽志。

晁端彥

端彥字美叔。官祕書監。

龍湫觀瀑

萬丈龍湫水。飛流翠壁開。始疑河漢落。翻若海潮來。飄灑四時雪。喧聞萬壑雷。廬山吾未到。氣象勝天台。雁山志。

晏幾道

幾道字叔原。號小山。殊幼子。監潁昌許田鎮。能文章。尤工樂府。有臨淄公風。子溥字慧開。靖康初官河北。與妻玉牒趙氏死難。

與鄭介夫

小白長紅又滿枝。築毬場外獨支頤。春風自是人閒客。張主繁華得幾時。

侯鯖錄。熙寧中鄭俠上書事作下獄。悉治平時所往還厚善者。晏叔原皆在數中。俠家搜得叔原與俠詩。裕陵稱之。即令釋出。

戲作示內